

PANDUAN RASULULLAH SAW

Laqad kana lakum fi rasul Allahi uswatun hasanah

“Sesungguhnya adalah bagi kamu pada (mengikuti jejak) Rasulullah ikutan yang baik. Dengan ayat suci inilah dan yang seumpamanya Tuhan telah mendidik umat Islam supaya menurut jejak Rasulullah (SAW) pada segala amal dan gerak langkahnya. Tetapi malangnya kebanyakan kita telah melanggar apa yang telah diperintahkan dan akibatnya kita semua telah hidup menderita. Diperkotak-katikkan oleh seteru-seteru kita. Adakah kita insaf? Lima ratus juta umat Islam di dunia pada hari ini, suatu jumlah yang bukan kecil bahkan boleh menggegar dunia kiranya kita bersatu padu dan taat setia kepada segala perintah Tuhan azza wa jalla. Hanya suatu jalan sahaja yang ada di hadapan kita bagi menebus kesalahan kita iaitu berbalik semula kepada ajaran Rasulullah dan menjadikan diri kita “orang Islam” yang sebenar-benarnya!

JAUHKANLAH DIRI DARIPADA MENGERJAKAN YANG HARAM

Tidak syak lagi bahawa kejatuhan sesuatu umat adalah disebabkan buruk akhlakunya dan cerobohnya melanggar larangan Tuhan. Untuk mencegah kejadian ini maka junjungan kita tidak sunyi di sepanjang-panjang hayatnya mengingatkan umatnya supaya segala tingkah laku, tutur kata, makan minum dan seterusnya hendaklah bersih daripada segala yang haram. Menungkan sabdanya yang dipeturunkan di bawah ini sebagaimana yang diriwayatkan oleh Al-Nuqman bin Basyir:

“Ima al-halala bayyinun wa al-harama bayyinun wa baynahuma mushtabahatun la ya’lamuha kathirun min al-nas, fa man ittaqa al-shubuhati istabra’a fih li dimihi wa ‘irdihi wa maan waqa’aha waqa’a al-harama ka al-ra’i hawala al-hima yushiku an yarta’a fih. Ala wa inna likulli malakin hima wa inna hima Allah ma harrama. Ala wa inna fi al-insani mudghatun idha salahat salahu al-jasadu kulluhu, wa idha fasadat fasada

al-jasadu kulluhu ala wa hiya al-qalbu”

Ertinya: “Sesungguhnya perkara yang halal itu jelas nyata dan perkara yang haram itu jelas nyata, (tetapi) di antara keduanya ada perkara-perkara yang samar (syubhah-syubhah yang tidak jelas) yang tidak diketahui oleh orang ramai: Maka barangsiapa menjauhkan diri daripada syubhah-syubhah tersebut ia telah membersihkan dengannya akan agama dan kehormatannya, dan barangsiapa yang merempuhnya maka ia telah merempuh yang haram, iaitu ibarat seorang gembala yang membawa binatang-binatang ternaknya di sekeliling kawasan larangan nyaris-nyaris akan masuk ia bersenang lenang di dalamnya. Ketahuilah bahawa sesungguhnya bagi tiap-tiap orang Raja “kawasan larangan: dan sesungguhnya “kawasan larangan” Allah ialah barang yang diharamkan olehNya. Ketahuilah bahawa sesungguhnya di dalam diri manusia ada seketul daging apabila elok ia maka eloklah jasad seluruhnya dan apabila rosak ia maka rosaklah jasad seluruhnya; ketahuilah bahawa ianya itu ialah hati”.

Sabdanya lagi sebagaimana yang diriwayatkan oleh Abu Hurairah:

“Ayyuhannas innallaha tayyibun la yaqbalu illa tayyiban wa innallaha amara al-mu’minun bima amara bihi al-mursalin fa qala: ya ayyuha al-rusulu kulu min tayyibati wa’malu salihan inni bima ta’mahuna ‘alim, wa qalu: ya ayyuha alladhina amanu kulu

*min tayyibati ma razaqnakum, (thumma dhakara
al-rajala) yutulu al-safara ash'atha aghbar thumma yamuuddu
yadayhi ila al-sama': ya rabba, ya rabba, wa mat'amuhu haramun
wa mashrabuhu haramun wa malbasuhu haramun wa ghudhaliya bi al-harami
fa inni yustajabu lidhalika*

Ertinya: “Wahai sekalian bahawasanya Allah Taala ialah baik (Maha Suci daripada segala kekurangan) tidak menerima melainkan yang baik (halal), dan bahawasanya Allah Taala telah memerintah orang-orang yang beriman dengan apa yang telah diperintahkan Rasul-rasulnya, firmanNya: Wahai Rasul-rasul makanlah kamu daripada segala yang baik (halal) dan beramallah kamu (dengan amalan) yang salih. Sesungguhnya Aku amat mengetahui akan apa yang kamu kerjakan, dan firmanNya: Wahai orang-orang yang beriman makanlah kamu daripada benda-benda yang baik (halal) yang telah kami kurniakan kepada kamu (baginda pun memberi misal perihal seorang lelaki lalu bersabda lagi): Ia menghabiskan perjalanan yang jauh dalam pelayaran sehingga rambutnya kusut masai dan tubuhnya berdebu. Kemudian ia menadah kedua tangannya ke langit – lalu berdoa: Tuhanku, Tuhanku, sedang makanannya haram, minumannya haram, pakaiannya haram dan telah diberi makan dengan barang yang haram maka bagaimanakah boleh doanya yang sedemikian itu diperkenan Tuhan?”

Benar sungguh gambaran junjungan kita. Bagaimana doa kita hendak diperkenankan Tuhan?? Bagaimana kita hendak mencapai kejayaan? Bagaimana kita hendak menjadi suatu umat yang berkedaulatan di tanah air sendiri? Bagaimana? Dan bagaimana? Sedang makanan kita haram, minuman kita haram, pakaian kita haram dan tingkah laku kita berselaput dengan haram!

Rahmat dan keampunan Mu hai Tuhan!

Insaflah saudara, sebelum kita ditimpa azab Allah yang lebih hebat lagi.

Diharap kiranya panduan Rasulullah salallahu alaihi wasalam yang dibentangkan ini dan yang akan dibentangkan – bihuala Allah – pada tiap-tiap keluaran majalah ini mendatangkan keinsafan!

-Abu Abdul Rahman.

Mereka Taat Kepada Allah

* * *

Dalam pertemuan dengan Fadhilah Al-Ustaz Hasan Al-Hudaibi pemimpin agung “Ikhwanul Muslimin” sebaik-baik sahaja Al-Malik Farouk turun takhta maka pemberita akhbar Perancis Le Monde- bertanya: “Adakah perjuangan tuan didasarkan kepada memerintah Mesir dengan hukum-hukum Islam?”

Bagi menjawab pemimpin agung “Persaudaraan Muslim” berkata:

“Yang kami utamakan ialah negeri ini (Mesir) hendaklah pemerintahannya berdasar Islam, dengan tidak menjadi hal adakah teraju pemerintahan terenggam di tangan “Persaudaraan Muslim” atau kepada parti yang lain”.

“Tetapi parti tuan tidak akan sanggup memegang teraju pemerintahan melainkan setelah pengikut-pengikut tuan terlatih mengerjakannya” tanya wartawan Perancis itu lagi.

Kemusykilan wartawan tersebut telah dijelaskan oleh Al-Ustaz Al-Hudaibi katanya:

“Ikhwanul Muslimin bertaburan menduduki segenap jawatan dan kedudukan di negeri ini.” (Maksudnya: mereka telah sedia terlatih dan sedang memenuhi jawatan-jawatan Menteri kepada pekerja biasa –P)

“Adakah mereka taat setia kepada tuan?” tanya wartawan itu lagi.

“Tidak – jawab Al-Ustaz Al-Hudaibi – mereka taat kepada Allah!”

-Abu Ali.